

Graduacion y e Abrazo Grandi

Di: Roland W. Peterson

E ta para dilanti di e spiel
Tras di su lomba e imagen ta para
cu un sonrisa orguyoso
Un imagen cu e conoce hopi bon
Un imagen cu ta graba den su curazon
E ta bira rond, pero ningun hende ta para su tras
Awor e ta wak atrobe den e spiel
E imagen no tey mas

Cu su dedenan frieu e ta mishi cu e spiel
E ta sinti un calor den e spiel
E kier caricia e spiel

E sa ... e sa cu e ta den su presencia
No awe mainta so, pero tur dia
Semper e ta sinti su presencia
Y, ta hole e dushi fragancia

Pero awe ... awe e a mire pa prome bes
No ... no e no ta su imaginacion
Awe e ta laga sa cu e lo tey
E lo tey pa e Graduacion
Awe ta e dia cu e lo a haya e "Abrazo Grandi"

E bashi den su curazon
Ta hasi dolor
E sa cu nunca mas e lo mire.
Seuche of mishi cu ne

Durante e recorido den auto
E ta blo pensa riba e temponan
Cu nan a pasa hunto
E piscamento, e weganan di domino.
E harimentonan y e bon consehonan

E ta staciona e auto
Y prome cu el a baha e ta susura
"Danki... Papa!".